

Ч. 39. (123). Крыница, четверг дня 8. жолтня (25 вересня). 1936. Рок III.



Орган Лемковского Союза.

Выходит в каждый четверг.

Редакция и администрация в Крынице. — Адрес „Лемко” Крыница.

Всіх читателей, котры не вплатили ище пренумераты, просиме выровнати якнайскорше рахунки.

## Новый Владыка обнял власть.

В субботу дня 3. жолтня т. р. отбыло ся в Рыманові Здрою велике торжество обнятия власти через нашего новоназначенного Владыку, Апостольского Администратора для Лемковщины, Ексц. Д-ра Якова Медвецкого.

Рано о год. 10-ой Достойный Номинат проваджений через Его Ексц. Д-ра Францишка Лисовского Епископа — Ордынария тарновского, в асистенции Панского Пралата и посла до Сейму о. Д-ра Любельского, О. О. Консульторов и численного священства обох обрядов удал ся до поблиской здравой каплицы, где отслужил архирейску Литургию.

В торжестве приняли участие достойники державны, а то: вице-губернатор львовский Д-р. Хмелевский, староста ясельский Ю. Марошани, яко представитель воєводства краковского и всі старосты лемковских повітов. Армию репрезентовал на торжестве полковник Чадек, командующий 2-ым полком подгальянских стрільцов в Сяноці.

Перед каплицом стояла почетна комания войска и войсковый оркестр Сяноцкого полка,

Помимо непогоды сошло ся много вірных и каплица была наполнена по береги.

По литургии, в часі общей трапезы, выголошено при поднеслом настрою ряд бесід, в котрых бесідники подносили потребу сотрудничества меже церковными и державными властями, яко залог добра всіх жителей в державі. Момент тот подчеркнул так Ексц. Апостольский Администратор, як также Ексц. Епископ — Ордынарий о. Д-р. Лисовский, котрый именем своим и именем латинского священства запевнял в братной любви и помочи для нашего народа,

Меже иншими, привітствовал новоназначенного Владыку г-н Сов. Гулла сениор Ставропигийского Института, найстаршого церковного братства на Гал. Руси, а именем львовских русских обществ професор Д-р. Адриан Копыстьянский. От имени Лемко-Союза выголосил бесіду председатель Лемко-



Союза Д-р. Орест Гнатышак, котрый в своей бесіде подчеркнул, же днешне торжество ест праздником стойкости Лемковщины и святом победы долготной борьбы лемков за свои чувства, за свое имя и право самостановления о своих религиозных

и культуральных потребах. Лем при содействии Апостольского Администратора и державных властей, може Лемковщина надіати ся культурального и материяльного движення.

Вся Лемковщина надіе ся, же сміле, ясне и рішуче становище Апост. Администратора найде в сердцах лемковского населения отзыв любви и довіря и може причинити ся до злучения розбитой и ослабленной религиозной борбам Лемковщины.

Лемко-Союз и редакция Лемка высказуют свою щирю радость по поводу назначения Ексц. О. Д-ра Якова Медвецкого Апостольским Администратором для Лемковщины, привітствуют Его сердечно, увіряючи Его в готовности своего сотрудничества для добра населения и желают Ему много сил для успішного труда!

## Бои в Палестыні не устают.

В Палестыні бои не лем не устают, але наоборот приберают на силі. Под Наблус на отділ английских войск напали арабскы повстанцы. По долшом бою, в котром по стороні английской приняли участие также самолеты, арабов примушено до утечи, лишаючи на поли боя 44-ох убитых.

Также кривавый бой росограл ся в Галилеи недалеко горского ланцуха Сафед. В бою том згнуло 40-ох арабов.

В кривавом бою под Геброн оден с английских офицеров был раненый.

ПОМІЩАЙТЕ  
ОГОЛОШЕННЯ  
В ГАЗЕТІ „ЛЕМКО”

Пренумерата в краю:  
30 грошей місячно,  
80 „ квартално  
1-50 „ полрочно,  
3 зл. рочно.

В Амерыці: 1 дол. рочно.

В Чехословакии:  
2 кор. місячно, 10 кор. полрочно,  
20 кор. рочно.

Ціны оголошень:  
Ціла сторона 120 зл.,  $\frac{1}{2}$  стороны 60 зл.,  $\frac{1}{4}$  стороны 35 зл.,  
 $\frac{1}{8}$  стор. 20 зл.,  $\frac{1}{16}$  стор. 10 зл.;  
оголошения малы за 1 мм. 20 гр.,  
в тексті 30 гр., перед текстом  
40 гр. При місячном и долшом  
оголошеню значна знижка.

Контото чекове Нр. 404.155.



## КАРПАТСКА РУСЬ В БОРБІ О АВТО- НОМІЮ!

Як відомо Карпатська Русь була прилучена до Чехословаччини на основі угоди, заключеної в Америці і Парижі між чехами і представителями карпато-руського народу.

Силом той угоди Карпатська Русь мала мати свою автономію, свій сейм, свої уряди, свій урядовий язык і свого губернатора. С того вшиткого чехи не додержали ані одної точки угоди. Правда, — єст в Ужгороді особа, котру називають губернатором, але то лем назва — титул, бо тот губернатор не має жадной власти. Вшитка власть находить ся в руках назначеного с Праги урядника чеха.

Перед тыжднем карпаторуский губернатор Грабар заявил отверто в Празі, же не хоче быти лем для парады и зажадал от чешского правительства также власти и голоса в справах, котры дотычат Карпатской Руси. Газеты пишут, же вернул с ничим, бо Прага не хоче выпустити полной власти со своих рук и не годит ся на жадны уступки для карпаторуского народа. В Празі повідають, же руснакы, то ище недозрілий народ и они т. б. чехы мусят ся нима дальше опековати т. б. до часу, аж помудріють.

## Смерть 7-ох ученых и 32-ох моряков на дні океана.

Дня 16 вересня на Ледоватом Океані при берегах морозного острова Исландии розбил ся о скалы французский корабель, котрый вез на своем покладі наукову выправу подбігунну, зложену с 7-ох ученых со славным на цілий світ доктором Шаркотом. Выправа тота через килька місяцов розсліджовала недоступны ледоваты закутины около полнотного бігуна и по окончених роботах вертала с громадным науковым материялом до Швеции, штобы соттамаль отплынути до родного краю.

На кораблі находило ся кромі тых 7-ох ученых также 28 моряков и 5 офицеров морских. Згынули всі, уратовал ся лем чудом оден моряк.

Уратованый моряк оповідає, же буря, котра метала корблем уж пару дней, около полночи на 16-го вересня прибрала ище на силі. Здає ся, же серед той страшной бурі капитан корабля помылил ся и принял одну літарню морську за другу. Корабель, стремячи ку літарні, в'їхал над раном на плитку воду и зарыл в піску коло Исландии. По многих трудах сопхано єго знова на глибоку воду. Але оказало ся, же корабель ся передыравил и вода почала доставати ся до машин. От того тріснул котел и корабель занурил ся в воді. Капитан выдал приказ заложити ратунковы пасы и скакати до воды. Скочил и выратованый моряк. Он зловил пливучу бельку и через 4 години старал ся наблизити до берега. Коли уж гынул с перемученя, узріли єго рыбаки и выратовали.

С 39-ох жертв того страшного несчастья море вышмарило на берег 30 трупов.

## Страшне пережитє летчика.

Страшный час пережил оден голендерский летчик. Летчик тот летячи до Калькуты в Индиях, задержал ся в Бомбаю. Там на улице встрітил он усмирителя гадюк, котрый показовал штуку с величезным оказом барз опасного ужа окулярника. На звук пищалки усмирителя ідовитый гад выползал с коша и выпростовуючи ся до половины и розширяючи ребра, кывал ся в такт музыкы. На приказ усмирителя вползал с поворотом до коша.

Летчик довідал ся от усмирителя, же в Бомбаю веде ся єму планно и же значно лучше жило бы ся єму в Калькуті. Он, милосердячи ся над усмирителем, забрал єго с собою до самолета.

Коли самолет взнес ся высоко в гору и от вітра начал ся колысати, не привыкый до такой подорожи усмиритель перевернул ся и сомліл.

Летчик не знал нич о том. Аж нагло чує,

же штоси зимне переїхало єму по лиці. Обернул ся и узріл страшного гада, выпростованого на хвості и кывающего ся в обі стороны, може в такт мотору.

Летчик оглянул ся поволи и ку своему перераженю увиділ лежачого непритомного усмирителя. Тепер летчик знал, же жите єго зависиме єст от ідовитого ужа, котрого каждый рух може розгнівати и спричинити неминуєму смерть. Але вітер был так сильный, же треба было напружити всю увагу на апараті.

Як долго так іхал, сам не знає. В каждом разі час тот выдає ся єму віком. Летчик іхал, як непритомный. Пришол до себе аж втотчас, коли усмиритель, повернувши до притомности, почал завывати гада до повороту до коша.

Прилетівши до Калькуты, милосердный летчик заявил, же за жадны скарбы світа не забрал бы вещь на свой самолет усмирителя ужей.

## Украинска просвіта.

Счастливо и в згоді жили давнійше люды в наших горах. Не было николи биток, а о том, штобы сусід сусіда забил, никто не хыровал. Аж коли пришла в наши горы якаси культура украинска, коли до сел начали присылати ріжны украинскы газеты и баламутити народ ріжныма просвітами, почала ся у нас псути згода и братска любовь и штотаз частійше чує ся о случаях побитыя меже людьми.

Дня 21. вересня т. р. был такой несчастливый случай в Ростоці Великой пов. новосандецкого. Два славны украинскы „козерлюгы“ — братья Дмитро и Павел Саламуны напали на Александра Репелу и побили єго так тяжко, же тот в коротком часі умер.

В своей завадятьской — атаманской фантазии шмарили ся пак убийцы на сына пок. Александра Репелы, Петра, а также на Дмитра Головяка, Ваня Шафрана, Томка Поливку и Адама Гамбаля и кто знає, чим бы окончила ся мазепинска забава, як бы полиция не забрала под ключ славных „просвітників“.

От до какой просвіты довели непрошены опекуны украинцы наши горы.

## Што натворила мамина корова и масурате дівчатко.

В літі того року, — як звичайно што року — был в Крыниці театр. Меже актерами того театра был знаный литерат д-р. Ж. Новаковский, котрый до великой газеты „Ilustrowany Kurjer Codzienny“ часто писує поважны, а часом и дотепны и смішны фелетоны.

Со своего побыта в Крыниці был п. Новаковский барз рад, писал о Крыниці барз красні, а же Крыница лежит на Лемковщині, то п. Новаковский и о лемках не забыл написати. Написал п. Новаковский о лемках не дуже, бо их не знає, перший раз их на очи виділ и як долго жиє, ище с жадным лемком слова не цогварил, — але за того кусьцьок, што написал, то Боже му запласть.

Повідає пан Новаковский, же гдеси раз поїхал с Крыницы автом меже наши села, — (як гварят, на спацыр) и по пути встрітил корову. Корова ишла неприписовом сторо-

ном дороги и мало же не побола авто, кед было бы скорше не скрутило до фосы.

Але на том не конец, же лемковска корова не знає дорогових приписов. Гев было ище планьше. Якеси, повідає пан Новаковский — дівчатиско ишло за коровом и як взріло, же машина пре на корову и с того вшиткого мамина корова готова выйти без рогов, без хвоста, або ище дашто планьше, заклало паскудні: „п.....в, тот поляк был бы мі живину забил“. Некрасні дівча повіло и в нас єго никто за тото не похвалит, але ище стократ брыдше отповіл пан Новаковский тому дівчату в газеті „І. К. С“. И то не лем саме дівча и корову пустил до газеты, але цілу нашу Лемковщину змішал с тым масуратым дівчатком и єго недорічном паплянином. Пан Новаковский написал до газеты, котру читат в нашей державі около 300.000 людей, же лемкам за тото дівчаче гаданє нич не треба дати, же

шкода велика, же ся им своего епископа дало, же лемкы, то бодай ци не горши як тоты украинцы, што в білый день стріляють и рабуют, а в ночи палят и т. п.

Так то красні, с вродженим єму талантом, пан Новаковский описал Лемковщину. А вшитко през тоту мамину корову и масурате дівчатко!

Видите мои коханы, так то все быват, як по пути ходит мамина корова неприписовом стороном и як масурате дівчатко и великий артист и литерат зачнут ся бавити в политику.

Прото уважайте люды на приписову на пути для коров сторону и на масураты дівчатиска, жебы вещь с гамбы таку политику не пуцали, а мыслиме, реку, же як тото настане, то и пан Новаковский вещь уж так красні о лемках писати не буде! Боже му запласть и за тото, бо може бы людиска не знали, же якаси лемкы на світі сой жиють.





## Дбайме о добры лу- кы и пасовиска.

### Продолжение.

Со штучных навозов велику вагу маюць навозы фосфорово-потасовы, котры сут уважаны за навозы основны и доконче потребны.

Потас подаеце найчастейше в кайниті в количестві 6 до 10 сотнаров на 1 гектар. Фосфор найкористнейше ест давати в супертомасыні, котрой высоку вартость, яко навозу лучного потвердило дотепер много дослѣдов и обсервации селян. На 1 гектар даеце 300 — 400 сотнаров нормальнопроцентной (16%) супертомасыны, або 150 — 200 кг. супертомасыны высокопроцентной (30%).

Если иде о навоженіе азотом, то аж от 20-ох літ признано, же и азот ест лукам и пасовискам потребный. Спостережено, же на луках, одержуючих лем навозы фосфорово-потасовы губила ся трава и опадала врода. Аж коли начато давати также помочничи навозы азотовы (40 — 50 кг. чистого азоту на 1 гектар, т. е. тилько азоту, килько містит в собі 200 — 300 кг. высокопроцентного (20%) азотняку), травы на луках причинило ся и навоженіе почало ся оплачати.

Разуміе ся, же при навоженіи штучныма навозама каждый господар повинен перевести калькуляцийный рахунок и лем в тотчас выдавати гроши на навозы, если с рахунку выпадет, же выдаток вернет ся и при том ище господар дашто заробит.

С азотовых навозов даеце в осени лем азотняк, котрый высіваме в 1/3 части цілого навозу азотового, т. е. даеце 50 — 70 кг. азотняку высокопроцентного на 1 гектар.

Решту азотового навозу даеце вчас на весні и то в азотняку, сірчані амоні або в салітрянку.

Вапнованіе лук робиме лем в осени и то на грунтах тяжших што 4 — 5 літ по около 20 сотнаров паленого вапна на 1 гектар, а на грунтах легких што 4 — 5 літ по 10 — 15 сотнаров угляну вапна на 1 гектар.

Навозити луку повинно ся властиво каждого року, але каждого року мусит давати ся инши навозы и так:

в 1-ом року навозиме компостом	
в 2-ом " " кайнитом и азотняком	
абр сірчаном омоно- новым	
в 3-ом " " кайнитом и супер- томасыном	
в 4-ом " " гнояницом	
в 5-ом " " вапном	
в 6-ом " " азотняком, супертома- сыном и кайнитом	

Штобы каждый сам переконал ся о рациональности навоженія лук, нехай зробит пробу на невеличком фалатку луку. При зваженіи сіна с луку перед ей навоженіем и погодивше при сталом навоженіи ведля высьше поданой табличкы, переконал ся каждый, же сіно на луці поправит ся и буде его значно больше, як передом. Там, где росла квасница, появит ся тепер мягка солодка трава, там, где был возик, буде по навоженіи три, чотыри и веце возов.

## Як кормити куры, жебы ся добре несли.

Хованіе домашних птиц, а особенно кур не дае доходу, бо они зносят за мало яиц. Курка добре кормлена дае пересично 200, а часом и больше яиц рочно, а наши куры зносят их за цілый рок около 50 — 60 то звычайно лем в літі, коли яйца сут дешеві.

Штобы увеличити доходы, треба доконче так робити, штобы куры начинали нести ся скорше и несли ся долго.

В наших господарствах куры начинают ся нести звычайно аж на весну в другом році житя. Діе ся так прото, бо перезначае до хову куры, котры вылягают ся поздно, не сут ище до осени належито розвинены и корм, який они принимают, иде на розрост организма, а не на продукцию яиц.

Штобы молоды куры несли ся уж в осени, мусят они походити с вчасного лягу, лем втотчас они выроснут через літо и в осени будут ся уж нести, на чом заробиме ціле пол року.

Але и найвчаснейши куры не будут ся нести, если не достанут отвітного корму. У нас многы газдынї повідають, же куры маюць ся сами выкормити. В зерняны роботы, коли звозит ся до стодол хліб и пак, коли молотит ся зерно, кура находит дост корму, але поза тым часом куры треба доконче кормити. Тым кормом для кур не могут быти бандуркы, бо они містят в собі мало білка. Того то білка потребуе кура дуже. Потребуе его по того, штобы могла жити и по того, штобы могла вытворити яйце. Для власного организма треба кури 8 граммов білка, а для утворенія 1 яйца — 15 граммов білка и 5 граммов вапна на шкарлупу.

Тото білко и вапно мусит кура достати в кормі, а же потрафит она перетравити денно лем 100 граммов (10 дкг.) поживы, то с тых 100 граммов можна кури дати не больше як 65 до 70 граммов бандурок, а на решту (30 до 35 г.) повинны складати ся паши сытны, котры містят в собі білко и вапно. Аж по такой паши можеме надіяти ся, же кура буде ся нести. До таких сытных паш належат: зерно, горох, молоко, сыр и т. д., а с купных — мясна мучка, креда, соль.

При тых пашах, даных курам, куры будут нести ся добре и хованіе кур оплатит ся.

Штобы вытворило ся в организм куры с паши яйце, потреба на того 12 дней часу. Тож если начнеме кормити куры интенсивно, то аж по 12-ох днях можеме надіяти ся, же куры зачнут нести ся каждого дня.

## Открыто новый гатунок овец.

### Мас она волну синяву.

Здавало ся, же учены розслідили уж и описали всі гатункы звирят, жиющих на світі.

Тымчасом наукова выправа німецко-англицка в Кытаю, розсліджуючи горішний біг рікы Янтсе, открыла в горах незнанный совсем дотепер гатунок овец. Тоты овцы маюць синяву волну. Сут малы и барз страшливы. С трудом зловлено 12 штук. Переслао тоты оказы до зоологичных садов

в Англии и Німеччині, штобы там переконали ся, чи синява овца придаст ся в европейской господарці.

## До широких кругів руской общественности.

### Земляки!

Затяжний кризис і фінансовий стан нашого Общества не дають ему возможности развернути культурно-просвітительну роботу так, якби того хотілось. Скупі средства стісняють Общество і не позволяют ему здійснити плянів оживленія і розширенія діяльности серед найширших кругів руского народа в краю. По тій причині работа не може прийняти широких розмірів. Пляни так і остаються плянами:

Однако розширеніе і поглубленіе работи Общества для народа ест річію необходимою і невідложною. О тім все голоснейше говорится і пишется, того щораз більше настойчиво домагаються делегати на зіздах Общества. А вже найсильнейше пекучість тої справи чувствується на місцях, по наших селах, в наших читальнях.

Треба наконец здвинуті діло з мертвої точки.

Головна Управа, не звертаючи уваги на скудні матеріальні средства Общества, рішила уже в сім році розвинути роботу якнайширше.

В першій мірі иде о росширеніи издательного діла так в відношеніи розміра як і якості, щобы таким способом представити широкому загалу відповідну лектуру, дати читальням інтересну і добру книжку.

Иде о відповідне розширеніе сіти наших читалень і наложеніе читальняного діла в більшій чим до сеі поры мірі.

Иде наконец о відповідне забезпеченіе помочи нашій учащійся молодіжі, яким то ділом занимается спеціально при Обществі организована секція „Помощь Молодежи“.

Головна Управа рішилась на то, не даючись відстрашитись недостатком матеріальних средств. Средства ті, в виду браку яких небудь субвенцій зі стороны, соберем серед наших членів і сторонників дорогою всенародного збора пожертвовань.

Місяць жовтень об'явлений:

Місяцем пропаганди Общества ім. Михайла Качковского;

місяцем приєднання для него найбільшого числа членів;

місяцем пропаганды его изданій;

місяцем збора пожертвовань на цілі Общества.

Призываем всіх русских людей, наших членів і сочувствующих нашому Обществу і розвитку руского діла не тилько в Галичині, но і за сі преділами відозватись на наш клич.

Скромними, но всенародними жертвами будем будувати і розширяти кріпость руского просвітительного діла.

За Головну Управу Общества

ім. М. Качковского во Львові:

Секретар:

Вл. Шишка

Предсідатель:

Др. Адр. Копицянський

УВАГА:

Збір жертв на О-во Качковского провадиться дорогою лавіни, податі серед інтелігенції і дорогою масового збора пожертвовань серед руского селянства. Каждая читальня О-ва Качковского получае по тому ділу окреме письмо.



## Што чути в світі.

**Рим:** Видеокороль Абисинии, маршал Грациани має в коротком часі начати кампанію, маючи на цілі зайняти терени, котрі знаходяться ще під владією Абисинии, а передовсім провінцію Горе в западній Абисинии, где знаходиться тепер абисинське правительство.

**Льондон:** Англицькі газети доносять, же переговори німецько-совітські в справі уділення товарного кредиту в висоті 300 мільйонів марок сут уж на оконченю.

**Братислава:** Дня 24. вересня відбулася велика манифестація народної партії ксендза Глинки в Пищанах при участі 30 тисяч народу. В часі тої манифестації отчитав Глинка манифест до словаків, в котром словаки домагаються політичної і економічної автономії.

**Москва:** В зв'язі з маневрами в московському окрузі маршал Ворошилов виголосив велику бесіду, в котрій між іншим заявив: „Ми готові под виглядом організаційним і технічним зустрітись з кожним врагом і на кожному пункті, где хотів би он ударити на нашу пролетаріяцьку отчину.“

**Париж:** Рада міністрів в порозумінню з правительством Злучених Держав Полі. Америки і Англії видала декларацію, в котрій заявила, же в цілі розвитку світового добробуту і поднесення життєвої ступені народу обнижати паритет французького франка. Вартість франка мають обнижити о 25 — 30 процент.

**Женева:** Швейцарське правительство обнижило також курс швейцарського франка о 30 процент.

**Рим:** Італіянське правительство колюнізує опановані терени абисинські. До того часу поселило ся во східній Африці 8260 вояків окупаційної армії.

**Москва:** Нар. комисар внутрішніх діл і начальника Г. П. У. в Москві, Ягоду усунуто. На його місце покликано Михайла Ежова секретаря комуністичної партії. Також уступив со свого становища комисар почт Рыков і редактор „Известий“ Бухарин.

**Відень:** За приміром Франції і Швейцарії Голландія здевалюувала гульдена і Латвія — лата. Також Росія, Іспанія і Італія мають приступити до девальюації своєї валюти.

**Берлін:** На відкриттю нової шлезької автостради Вроцлав — Лигница Гітлер в своїй бесіді сказав, же за 5 літ Німеччина буде мати 7000 км. автострад.

**Відень:** В концентраційних німецьких таборах є тепер 205000 противників гітлеризма. Число того є доказом, як думать велика частина німців о правительстві Гітлера.

**Бургос:** Місто Толедо є опановане через повстанців. Тимсамим звільнено знаходячих ся в альказарі прапорщиків.

Правительственні війська сохабили на полі бою 300 убитих і обильний військовий матеріал.

**Париж:** Одним з цікавих в братоубійствених боях іспанських єст неписане порозуміння обох сторін а именно: обі сторони перестають атакувати в часі обідньої перерви і по заході сонця.

С Гібральтара доносять о морському бою між кораблями повстанців і мадритського правительства. В бою том затоплено корабель „Грецина“ належачий до правительства.

**Мадрид:** Ведля донесень з Мадрида президент іспанської республіки Азана уступив со свого становища. Азана мал висказати ся за капітуляцію і за перестанком домашньої війни і мал бити ув'язнений через комуністів. Влада в Мадриді обняли анархисти.

**Берлін:** Апровізаційне положення в Німеччині стає ся шторази тяжше. В останніх часах появило ся зарядження, забороняюче продавати сметану, сметанку і сыр для домашнього ужитка. Провіянти тоті буде можна продавати лем для реставрацій і цукорень.

**Женева:** Мадридське правительство зложило в Лізі Народів документи, котрі доказують, же повстанці одержують військові транспорти з Португалії, Німеччини і Італії.

**Льондон:** Англицьке правительство оголосило в Палестині військове положення.

**Здох найстарший конь:** В осаді Бурчан Вуд в Англії здох конь Джембо. Был то найстарший конь не лем в Англії, але на цілому світі. Жил 44 і пол року.

Ректор королівської ветеринарської академії в Лондоні сказав, же кониско того малод о недавня одного рывалю, котрий дожив до 46 літ. Звичайно моні живуть от 30 до 35 літ.



## Вісти с краю.

**Варшава:** В цілій Польщі мають начати акцію пропагандову спорту скакання со спадхоронами. Ініціативу до тої акції дав „Л. О. Р. Р.“ Во всіх більших містах будуть заінстальовані спеціальні вежі до скакання на котрих буде вправляти ся в скаканню молодеж належача до спортової організації.

**Варшава:** В зв'язі з неоснованим підвищенням ціни цегли г-н. Прем'єр видал зарядження, же тоті, котрі поповняють товарову лихву при продажі цегли, будуть вислані до Картуз-Берези.

**Варшава:** Предсідатель Апеляційного Суду в Кракові Каз. Рудницький уступає з занимаючого становища. Его місце має зайняти заступник предсідателя Апел. Суду в Познані Савицький.



### СВЯТО В ВЕРХОМЛІ ВЕЛИКОЇ.

В неділю дня 11 жовтня 1936. о год. 2-гої по полудні відбуде ся в Верховлі Велікої ново-сандецького повіта.

#### посвячене

### угольного каменя

под дом чит. им. М. Качковского.

#### Програма:

- 1) О год. 2-гої збор под читальнюм.
- 2) Поход на кладбище, где под памятником повешеных Мучеников отслужит ся панихиду и выголосит ся промовы.
- 3) Поворот на площу чит., где торжественно заложит ся угольный камень.

Вечером представлєнє.

О масову участь доокрестного населєня просит.

Правлєнє чит.

КТО ХОЧЕ ЗАБЕЗПЕЧИТИ СЕБЕ НА СТАРОСТЬ И РОДИНУ  
ОТНУЖДЫ И ГОЛОДА, АБО ЗЛОЖИТИ ДІТЯМ ВІНО,

НЕХАЙ ЯКНАЙСКОРШЕ

заасєкурує ся

в асєкураційном Товаристві

ВИТА И КРАКОВСКЕ

во ЛЬВОВІ

Асєкурацію приймають на цілій Лем-ковщині  
представителі: гг. Осиф Яновицький — Крыница-Село и Михаил Перелом — Сянок.